

Regulacion di "All Inclusive" ta na interes di pueblo en general

ORANJESTAD - Durante di e reunion publico cu a trata e "Landsverordening tot wijziging van de Vergunningsverordening" mayoria di e parlamentarianan presente tawata di acuerdo cu e regulacion di "All Inclusive" tawata necesario.

Riba 7 di mei 2015 parlamento a haci un apelacion na minister Otmar Oduber pa medio di un mocion pa cuminsa haci un investigacion riba "All Inclusive" y minister Otmar Oduber a prepara e ley riba e mocion cu a wordo entrega.

Den e mocion parlamento a pidi minister pa haci un investigacion pa e posibilidad di un "vergunningstelsel" extraordinario pa hotelnan "All Inclusive" y riba e efectonan di un tipo di "vergunningstelsel" asina pa cu e economia Arubano. Meta di e mocion

Lorna C. Jansen-Varlack (AVP):

aki tawata pa frena e aumento di e cantidad di hotel cu ta ofrece exclusivamente "All Inclusive" e ultimo añanan aki y tambe pa frena e aumento di e cantidad di hotel cu ta ofrece "All Inclusive" banda di EP (European Plan). E cambionan aki den un "vergunningstelsel" of den un ley riba su mes, mester a wordo traha hopi aña pasa ora e gobierno e tempo ey a ripara cu e desaroyonan aki a cuminsa tuma luga den Caribe y pa colmo ora e gobernacion di MEP a cuminsa duna permiso na diferente hotel pa cu "All Inclusive".

Nos mester ta hopi mas consciente cu unabes diferente desaroyo cuminsa tuma luga rond mundo cu un dia e ta bay toca pais Aruba tambe y cu nos mester ta prepara pa.

No solamente pa e desaroyonan rond di "All Inclusive", pero tambe pa e consecuncianan. Loke ta importante ta pa hunto yega na un solucion, un regulacion unda tur e partnernan den sector hotelero por biba cun'e y beneficia di dje.

Un regulacion cu ta beneficia interes di pueblo en general. E bringamento riba e nivel di nos prome pilar economico no ta beneficia ningun hende y hasta por bira un fenomeno hopi peligroso.

Esunnan cu ta contra regulacion di "All Inclusive" y a beneficia tur e añanan di e economia di Aruba mester demostra cu e mesun forbor cu nan kier e miho pa pais Aruba. Sin regulacion di "All Inclusive" nos lo perhudica



e entrada di nos taxistanan, restaurantnan, cokinan, waiternan, esunnan cu ta bende souvenir banda di caminda, companianan di tour, importadornan etc.

Ya caba algun di e instancianan/companianan aki ta sufri di e tendencia aki.

Nos kier pa tur grupo cu ta

traha den sector hotelero beneficia di esaki y haya su fair-share. Despues di e resultado di e votacion riba e ley aki pueblo lo wak ken ta para pa e grupo cu tin nan interes personal na prome luga y ken ta para y traha berdaderamente pa e interes di pueblo en general. □

Ley di "all inclusive" ta yuda stabilisa turismo y economia di Aruba

Melvin Tromp (AVP):

ORANJESTAD - Parlamento ayera a sigui cu tratamento di e ley pa regla e fenomeno di "all inclusive" caminda manera tabata di spera, e ley a wordo aproba despues di un reunion cu hopi turbulento politico.

Melvin Tromp di fraccion di AVP a muestra cu gran satisfaccion riba e logro aki caminda cu e ley presenta pa Minister Otmar Oduber cu ta den preparacion pa basta luna caba, a keda aproba. "Apesar di e gran satisfaccion cu nos tin cu e aprobacion di e ley di 'all inclusive' a bolbe keda demostra cu politiconan den oposicion no ta duna un aportacion positivo na otro ley importante pa nos pueblo, pero ta prefera di gasta nan tempo pa opone tur iniciativa di gobierno di nos pais, simplemente pa hunga weganan politico sin sentido cu no ta sirbi interes algun di e interes general di nos pais.

Argumentonan sin motivacion, critica sin base y lubidando pa colmo berdandnan negativo di un pasado politico manera fraccion di MEP ta marca den historia politico di nos pais. Nos a trata un ley cu



ta sirbi e interes di tur hende, e interes di nos turismo y principalmente e interes economico di nos pais y nos pueblo y aki no ta trata di ta contra di hotelnan all inclusive pero pa controla e desaroyo di esaki pa evita influencianan negativo pa tanto e industria turistico den futuro como e aspecto economico. Pueblo por a scucha y mira un fraccion di MEP hiba disertacionnan sin pia sin cabes y pa colmo sin atende e aspecto general di e ley cu parlamento tabata tratando, cu ta e ley di all inclusive. Pa lunanan largo a reuni cu

varios instancia, a reuni y bolbe reuni cu Minister di Turismo Otmar Oduber, nos a reuni cu Minister di Salubridad dr. Schwengle y tambe cu varios otro Minister pa asina haya informacion completo y adecuado riba introduccion di e ley aki. Tur hende por a ripara e campaña grandi cu a ser hiba for di diferente sector pa trata di stagna of evita cu lo pasa e ley di all inclusive y hasta durante di e reunionnan aki di parlamento, por a scucha hopi riba e campaña difamatorio contra introduccion di e ley aki. Loke tambe tur hende por a

ripara den e reunion aki, ta e hecho cu fraccion di MEP simplemente no ta prepara pa hiba debate drechi riba e ley aki, y solamente a busca argumentonan politico pa trata di haci campaña politico den sala di parlamento. Un amienda cu fraccion di MEP a presenta ta pa mantene e actual porcentahe pa all inclusive na 38% y no aumenta esaki pa 40% pero na mes momento a keda confirma cu fraccion geel no kier mira un desaroyo turistico pa San Nicolas.

Argumentonan sin base, pa-

piando continuamente di un ATA-Bank di Minister di Turismo pero aki e lider di MEP, Evelyn Wever Croes, ta lubida cu su tata a lanta un banco hunto cu ex Prome Minister Nel Oduber, un banco cu recientemente a dicide di cera su porta lagando tur hende cu hopi duda riba kico realmente tabata pasa cu e banco aki. Tampoco Evelyn a papia di e asunto di cuenta di banco di Irus Crius cu te dia di awe su persona no a bin responsabilisa su mes den parlamento pa sumanan di placa cu ta bay riba cuenta di e negoshi aki, caminda su nomber tambe ta aparece den publicacionnan cu a tuma luga.

Nos fraccion a sostene e ley aki ya cu nos a kere den e maneho di Minister di Turismo kende a percura pa desaroyonan positivo den turismo di nos pais, cu ta wordo reconoci pa instancianan financiero internacional y tambe instancianan financiero di nos pais, y hasta a haya reconocimiento di AHATA cu a muestra di ta contra di introduccion di e ley aki.

Na final di e reunion durante di e motivacion di voto fraccion di MEP a bolbe muestra su mentalidad negativo cu argumentonan sin base y ridiculo cu no a duna un aporte adecuado na henter e proyecto di ley aki," parlamentario Melvin Tromp ta declara. □